

parle de ce que le dict Lieutenant general luy auoit dit, et qu'il alloit faire sortir la dicte Corruble ; luy Genaple enuoya aussytost aduertir le dict procureur general, et peu de temps apres le dict Lieutenant general vint aus dites prisons accompagné de deux huissiers, sçauoir Biron et Gosset, et en arriuant et paroissant irrité, il luy dist Vous auez donc receu vne femme prisonniere sans estre escrouée ; aquoy il repondit que oüy, Et qu'il l'auoit receue des mains des huissiers sur ce qu'ils luy auoient dit que c'estoit par ordre verbal du sieur Dupont Conseiller en cette Cour, Et a la requeste du proeureur general du Roy ; Et sur ce que le dit Lieutenant general luy dist qu'un conseiller n'auoit pas pouuoir de faire Emprisonner vne personne et qu'il pretendoit estre Maistre seul des prisons et qu'il y mettroit bien ordre, Luy Genaple repondit vous demeslerez vos differents, sur ce qu'il continuoit a refuser de faire ouurir la prison, Le dit Lieutenant general enuoya querir le Gressier de la dite preuosté, Et fit faire le dit proces verbal, Et qu'en enuoyant querir le dit Greffier par le dit Biron, il luy donna ordre de luy dire que s'il refusoit de venir, il luy dist qu'il en mettroit un autre en sa place qui feroit ce qu'il lui commanderoit, et qui y seroit toujours. ENQUIS si auparauant que le dit Lieutenant general se fust transporté dans les prisons, la dite Corruble n'auoit parlé a personne. ADICT QUE NON de sa connoissance, mais qu'ayant esté le matin du dit jour samedy visiter la dite Corruble en prison, sur ce qu'il l'entendit sangloter comme sy elle eust suffoqué, Et Luy ayant demandé ce qu'elle auoit ainsy a se plaindre apres auoir paru si resoluë auparauant, et que quand elle seroit preste de mener au suplice elle ne seroit pas plus triste ; Qu'elle repondit encor si je sçauois ce que l'on me veut faire. Il luy dist que vous pourroit on faire, vous auez peut estre dict quelque parole contre Monsieur Dupont, et on vous veut mortifier ; a quoy elle repartit cela pourroit bien estre, car defay m'a dit que je n'y serois pas vingt quatre heures, Et luy qui parle luy ayant dit, Comment pouuez vous l'auoir veu et luy auoir parlé Vrayment Le pauvre garçon dit elle il a passé toute la nuict a la fenestre enuveloppé dans son manteau. ENQUIS si la dite Corruble estoit presente lors que le dit Lieutenant general fit son proces verbal, a dit que le dit Lieutenant general ayant demandé a parler a la dite Corruble, et qu'il eust a la faire venir, ce que Luy qui repond n'ayant voulu accorder, Le dit Gosset donna